

摘藻堂四庫全書薈要

集部

欽定四庫全書薈要卷一萬九千七百九十六

集部

樂府詩集卷八十三

宋 郭茂倩 編

雜歌謠辭

言者心之聲也歌者聲之文也情動於中而形於言言之不足故嗟歎之嗟歎之不足故永歌之歌之為言也長言之也夫欲上如抗下如墜曲如折止如槁木倨中矩

句中鉤纍纍乎端如貫珠此歌之善也宋
書樂志曰黃帝帝堯之世王化下洽民樂
無事故因擊壤之歡慶雲之瑞民因以作
歌其後風衰雅缺而妖淫靡曼之聲起周
衰有秦青者善謳而辭談學謳於秦青未
窮青之伎而辭歸青餞之於郊乃撫節悲
歌聲震林木響遏行雲辭談遂留不去以
卒其業又有韓娥者東之齊至雍門匱糧

乃鬻歌假食既去而餘響繞梁三日不絕
左右謂其人不
去也過逆旅逆旅人辱之
韓娥因曼聲哀哭一里老幼悲愁垂涕相
對三日不食遽追之韓娥還復為曼聲長
歌一里老幼喜躍抃舞不能自禁志向之
悲也乃厚賂遣之故雍門之人善歌哭効
韓娥之遺聲衛人王豹處淇川善謳河西
之民皆化之齊人綿駒居高唐善歌齊之

右地亦傳其業前漢有魯人虞公者善歌

能令梁上塵起若斯之類竝徒歌也爾雅

曰徒歌謂之謠廣雅曰聲比於琴瑟曰歌

韓詩章句曰有章曲曰歌無章曲曰謠梁

元章一作帝纂要曰齊歌曰謳吳歌曰歛楚

歌曰豔浮歌曰哇振旅而歌曰凱歌堂上

奏樂而歌曰登歌亦曰升歌故歌曲有陽

陵白露朝日魚麗白水白雪江南陽春淮

南駕辯淶水陽阿採菱下里巴人又有長
歌短歌雅歌緩歌浩歌放歌怨歌勞歌等
行漢世有相和歌本出於街陌謳謠而吳
歌雜曲始亦徒歌復有但歌四曲亦出自
漢世無弦節作伎最先一人唱三人和魏
武帝尤好之時有宋容華者清徹好聲善
唱此曲當時特妙自晉已後不復傳遂絕
凡歌有因地而作者京兆邯鄲歌之類是

也有因人而作者孺子才人歌之類是也
有傷時而作者微子麥秀歌之類是也
有寓意而作者張衡同聲歌之類是也
有寤戚以困而歌項籍以窮而歌屈原以愁而歌
卞和以怨而歌雖所遇不同至於發乎其
情則一也歷世以來歌謳雜出今竝採錄
且以謠讖繫其末云

歌辭

擊壤歌

帝王世紀曰帝堯之世天下大和百姓無事有八九十老人擊壤而歌

日出而作日入而息鑿井而飲耕田而食帝何力於我哉

卿雲歌三首

尚書大傳曰舜將禪禹於時俊乂百工相和而歌卿雲帝乃唱之曰卿雲爛兮八伯

咸進稽首曰明明上天帝乃再歌曰日月
有常史記天官書曰若烟非烟若雲非雲
郁郁紛紛蕭索輪囷是謂慶雲慶雲即卿
雲蓋和氣也舜時有之故美之而作歌

卿雲爛兮糺漫漫兮日月光華旦復旦兮

明明上天爛然星陳日月光華弘于一人

日月有常星辰有行四時順經萬姓允誠於予論樂配
天之靈遷于賢善莫不咸聽聳乎鼓之軒乎舞之精華

已竭褰裳去之

塗山歌

吳越春秋曰禹年三十未娶行塗山恐時
暮失嗣辭云吾之娶也必有應也乃有白
狐九尾造於禹禹曰白者吾之服也九尾
者王之證也於是塗山之人歌之禹因娶
塗山謂之女嬌

綏綏白狐九尾
厖厖我家嘉夷
來賓為王成于
家室我

都攸昌天人之際於茲則行明矣哉

夏人歌二首

尚書大傳曰夏人飲酒醉者持不醉者不
醉者持醉者而歌曰盍歸乎亳亳亦大矣
伊尹退而更曰覺兮較兮吾大命格兮去
不善而善何不樂兮亳湯之都言當歸湯
也韓詩外傳曰桀為酒池糟隄縱靡靡之
樂一鼓而牛飲者三千羣臣皆相持而歌

江水沛兮舟楫敗兮我王廢兮趣歸于亳亳亦大兮
樂兮樂兮四牡驕兮六轡沃兮去不善而從善何不樂
兮

商歌二首

甯戚

淮南子曰甯越欲干齊桓公困窮無以自
達於是為商旅將任車以商於齊暮宿於
郭門外桓公郊迎客夜開門辟任車爇火
甚盛從者甚衆越飯牛車下望見桓公而

悲擊牛角而疾商歌桓公聞之曰異哉非
常人也命後車載之越一作戚

南山斫白石爛生不遭堯與舜禪短布單衣適至胥從
昏飯牛薄夜半長夜漫漫何時旦

滄浪之水白石梁中有鯉魚長尺半弊布單衣裁至胥
清朝飯牛至夜半黃犢上坂且休息吾將捨汝相齊國

師乙歌

家語曰孔子相魯齊人歸女樂魯君淫荒

孔子遂行師乙送孔子曰吾欲歌可乎乃
歌之

彼婦人之口可以出走彼婦人之謁可以死敗優哉游
哉聊以卒歲

獲麟歌

孔子

孔叢子曰叔孫氏之車子鉏商樵於野而
獲麟焉衆莫之識以為不祥棄之五父之
衢冉有告曰麋身而肉角豈天之妖乎夫

子曰吾將往觀焉遂泣曰予之於人猶麟也麟仁獸出而死吾道窮矣乃歌云

唐虞世兮麟鳳游今非其時來何求麟兮麟兮我心憂

河激歌

趙簡子夫人

列女傳曰女娟者趙河津吏之女也簡子南擊楚津吏醉卧不能渡簡子簡子怒召欲殺之娟懼持楫走前曰願以微軀易父之死簡子遂釋不誅將渡用楫者少一人

娟攘袂操楫而請簡子遂與渡中流為簡
子發河激之歌簡子歸納為夫人

升彼河兮而觀清水揚波兮杳冥冥禱求福兮醉不醒
誅將加兮妾心驚罰既釋兮瀆乃清妾持楫兮操其維
蛟龍助兮主將歸呼來權兮行勿疑

越人歌

劉向說苑曰鄂君子皙泛舟於新波之中
乘青翰之舟張翠蓋會鍾鼓之音畢榜枻

越人擁楫而歌於是鄂君乃揄脩袂行而擁之舉繡被而覆之鄂君楚王母弟也

今夕何夕兮寒洲中流今日何日兮得與王子同舟蒙羞被好兮不訾詬恥心幾頑而不絕兮得知王子山有木兮木有枝心說君兮知不知

徐人歌

劉向新序曰延陵季子將聘晉帶寶劍以過徐君徐君觀劍不言而色欲之季子未

獻也然其心許之矣使反而徐君已死季
子於是以劒帶徐君墓樹而去徐人乃為
之歌

延陵季子兮不忘故脫千金之劒兮帶立墓

漁父歌

古辭

楚辭曰屈原既放游於江潭漁父見之鼓
枻而歌滄浪水名也清諭明時可以振纓
而仕濁諭亂世可以抗足而去故孔子曰

清斯濯纓濁斯濯足矣言自取之也若張
志和漁父歌但歌漁者之事

滄浪之水清兮可以濯吾纓滄浪之水濁兮可以濯吾
足

漁父歌五首

張志和

西塞山邊白鷺飛桃花流水鱖魚肥青箬笠綠蓑衣春

江一作斜風細雨不須歸

釣臺漁父褐為裘兩兩三三舴艋舟能縱棹慣乘流長

江白浪不曾憂

雲溪灣裏釣漁翁
舴舺為家西復東
江上雲浦邊風笑
著荷衣不歎窮

松江蟹舍主人歡
菰飯莼羹亦共餐
楓葉落荻花乾
醉宿漁舟不覺寒

青草湖中月正圓
巴陵漁父棹歌連
釣車子掘頭船
樂在風波不用仙

同前

和凝

白芷汀寒立鷺鷥蘋風輕翦浪花時烟幕幕日遲遲香
引芙蓉惹釣絲

同前

歐陽炯

風浩寒溪照膽明小君山上玉蟾生荷露墜翠烟輕撥
刺遊魚幾處驚

同前三首

李珣

水接衡門十里餘信船歸去卧看書輕爵祿慕玄虛莫
道漁人只為魚

避世垂綸不記年官高爭得似君閒
傾白酒對青山笑
指柴門待月還

棹警鷗飛水濺袍影侵潭面柳垂條
終日醉絕塵勞曾
見錢塘八月濤

採葛婦歌

吳越春秋曰采葛越之婦人傷越王用心
乃作若何之歌

嘗膽不苦味若飴
今我采葛以作絲

紫玉歌

樂府詩集曰紫玉吳王夫差女也作歌詩
以與韓重

南山有鳥北山張羅意欲從君讒言孔多悲結成疹沒
命黃墟命之不造寃如之何羽族之長名為鳳凰一日
失雄三年感傷雖有衆鳥不為匹雙故見鄙姿逢君輝
光身遠心近何曾暫忘

鄴民歌

史記曰魏襄王時史起為鄴令引漳水溉
鄴以富魏之河內而民作歌云

鄴有賢令兮為史公決漳水兮灌鄴旁
終古烏鹵兮生稻梁

鄭白渠歌

史記曰韓聞秦之好興事欲罷無令東伐
迺使水工鄭國間說秦令鑿涇水自中山
西抵瓠口為渠竝北山東注洛溉烏鹵之

地四萬餘頃今日鄭國渠漢書曰太始二
年趙中大夫白公復奏穿渠引涇水首起
谷口尾入櫟陽注渭中袤二百里溉田四
千五百餘頃名曰白渠人得其饒於是歌
之

田於何所池陽谷口鄭國在前白渠起後舉
畝如雲決渠為雨涇水一石其泥數斗且溉
且糞長我禾黍衣食京師億萬之口

百里奚歌

高允生

羈旅入秦庭始得收顯曜釋褐出輜車卓為千乘道豔
色進華容繁弦發微調居貴易素心翻然忘久要裝金
五羊皮寫情陳所告豈徒望自傷念君無定操

秦始皇歌

古今樂錄曰秦始皇祠洛水有黑頭公從
河中出呼始皇曰來受天寶乃與羣臣作

歌

洛陽之水其色蒼蒼祠祭大澤倏忽南臨洛濱醞禱色
連三光

雞鳴歌

樂府廣題曰漢有雞鳴衛士主雞唱宫外
舊儀宮中與臺竝不得畜雞晝漏盡夜漏
起中黃門持五夜甲夜畢傳乙乙夜畢傳
丙丙夜畢傳丁丁夜畢傳戊戊夜是為五
更未明三刻雞鳴衛士起唱漢書曰高祖

圍項羽垓下羽是夜聞漢軍四面皆楚歌
應劭曰楚歌者雞鳴歌也晉太康地記曰
後漢固始鮑陽公安細陽四縣衛士習此
曲於闕下歌之今雞鳴歌是也然則此歌
蓋漢歌也按周禮雞人掌大祭祀夜嘑旦
以詔百官則所起亦遠矣

東方欲明星爛爛汝南晨雞登壇喚曲終漏盡嚴具陳
月沒星稀天下旦千門萬戶遞魚鑰宮中城上飛烏鵲

雞鳴曲

王建

雞初鳴明星照東屋雞再鳴紅霞生海腹百官待漏雙
闕前聖人亦挂山龍服寶釵命婦燈下起環珮玲瓏曉
光裏直內初燒玉案香司更尚滴銅壺水金吾衛裏直
更一作郎妻到明不睡聽晨雞天頭日月相送近夜棲旦
鳴人不迷

同前

李廓

星稀月没上五更膠角角雞初鳴征人牽馬出門立

辭妾欲向安西行再鳴引頸簷頭下月中角聲催上馬
纔分地色第三鳴旌旗一作旆紅塵已出城婦人上城亂
招手夫婿不聞遙哭聲長恨雞鳴別時苦不遣雞栖近
窗戶

平城歌

漢書匈奴傳曰高祖自將兵三十二萬擊
韓王信帝先至平城步兵未盡到冒頓縱
精兵三十餘萬圍帝於白登七日漢兵中

外不得救餉樊噲時為上將軍不能解圍
天下皆歌之後用陳平祕計得免白登在
平城東南去平城十餘里

平城之下亦誠苦七日不食不能設弩

楚歌

漢高帝

漢書曰高祖欲立戚夫人子趙王如意而
廢太子後不果戚夫人泣涕帝曰為我楚
舞吾為若楚歌其旨言太子得四皓為輔

羽翼成就不可易也顏師古曰楚歌者楚人之歌猶吳歆越吟也

鴻鵠高飛一舉千里羽翼以

一作已

就橫絕四海橫絕四

海又可奈何雖有繒繳尚

一作將

安所施

吳楚歌

傅玄

樂府詩集曰傅玄辭一曰燕美人歌

燕人美兮趙女佳其室則邇兮限曾崖雲為車兮風為馬玉在山兮蘭在野雲無期兮風有止思心多端誰能


理

同前

張籍

庭前春鳥啄林聲
紅夾羅襦縫未成
今朝社日停針線
起向朱櫻樹下行

樂府詩集卷八十三



總校官進士臣胡榮

校對官編修臣裴謙

謄錄監生臣邱桂蟾

欽定四庫全書薈要

集部

樂府詩集卷八十四至
六

詳校官候選知縣臣吳甸華



欽定四庫全書蒼要卷一萬九千七百九十七 集部

樂府詩集卷八十四

宋 郭茂倩 編

雜歌謠辭

歌辭

戚夫人歌

漢書外戚傳曰高祖得定陶戚姬愛幸生
趙隱王如意惠帝立呂后為皇太后迺令

永巷囚戚夫人髡鉗衣赭衣令舂戚夫人
舂且歌太后聞之大怒曰乃欲倚子邪名
趙王殺之戚夫人遂有人毘之禍

子為王母為虜終日舂薄暮常與死為伍相離三千里
當誰使告汝

畫一歌

漢書曰惠帝時曹參代蕭何為相國初高
帝與何定天下法令既明具及參守職舉

事無所變更一遵何之約束於是百姓歌
之

蕭何為法講若畫一曹參代之守而勿失載其清靜民
以寧壹

趙幽王歌

漢書曰趙幽王友高帝之子孝惠時友以
諸呂女為后不愛愛他姬諸呂女讒之於
太后太后怒召趙王置邸令衛圍守之趙

王餓乃作歌遂幽死

諸呂用事兮劉氏微迫脅王侯兮彊授我妃我妃既妒
兮誣我以惡讒女亂國兮上曾不寤我無忠臣兮何故
棄國自快中野兮蒼天與直吁嗟不可悔兮寧早自賊
為王餓死兮誰者憐之呂氏絕理兮託天報仇

淮南王歌

漢書曰淮南厲王長高帝少子也長廢法
不軌文帝不忍置於法迺載以輜車處蜀

嚴道邛郵遣其子子母從居長不食而死
後民有作歌歌淮南王帝聞之迺追尊淮
南王為厲王置園如諸侯儀

一尺布尚可縫一斗粟尚可舂兄弟二人不相容

京兆歌

陸 厥

通典曰京兆馮翊扶風皆古雍州之域秦
始皇以為內史漢景帝二年分置左右內
史武帝改左內史為左馮翊右內史為右

扶風後與京兆號三輔故趙廣漢云亂吾
治者常二輔是也

兔園夾池水脩竹復檀欒不如黃山苑儲胥與露寒
灑迤傍無界岑峯鬱上干上干入翠微下趾連長薄芳露
浸紫莖秋風搖素萼雁起宵未央雲間月將落照梁桂
兮影徘徊承露盤兮光照灼壽陵之街走狐兔金卮玉
盃會銷鑠願奉蒲萄花為君實羽爵

左馮翊歌

陸 厥

上林滴紫泉，離宮赫千戶。飛鳴亂鳧雁，參差雜蘭杜。比翼獨未羣，連葉誰為伍。一物或難致，無云泣易覩。

扶風歌九首

劉琨

朝發廣莫門，暮宿丹水山。左手彎繁弱，右手揮龍淵。
顧瞻望宮闕，俯仰御飛軒。據鞍長歎息，淚下如流泉。
繫馬長松下，發鞍高嶽頭。冽冽悲風起，泠泠澗水流。
揮手長相謝，哽咽不能言。浮雲為我結，飛鳥為我旋。
去家日已遠，安知存與亡。慷慨窮林中，抱膝獨摧藏。

麋鹿遊我前，猴猿戲我側。資糧既乏盡，薇蕨安可食。
攬轡命徒侶，吟嘯絕巖中。君子道微矣，夫子故有窮。
惟昔李愬期，寄在匈奴庭。忠信反獲罪，漢武不見明。
我欲竟此曲，此曲悲且長。棄置勿重陳，重陳令心傷。

同前

鮑照

昨辭金華殿，今次雁門縣。寢卧握秦戈，棲息抱越箭。忍
悲別親知，行泣隨征傳。寒烟空徘徊，朝日乍舒卷。

秋風辭

漢武帝

漢武帝故事曰帝行幸河東祠后土顧視
帝京忻然中流與羣臣飲讌帝歡甚乃自
作秋風辭

秋風起兮白雲飛草木黃落兮雁南歸蘭有秀兮菊有
芳懷佳人兮不能忘汎樓船兮濟汾河橫中流兮揚素
波簫鼓鳴兮發擢歌歡樂極兮哀情多少壯幾時兮奈
老何

衛皇后歌

漢書曰衛子夫為皇后弟青貴震天下
下歌之按外戚傳衛子夫為平陽主謳者
武帝被霸上還過平陽主既飲謳者進帝
獨說子夫帝起更衣子夫侍尚衣軒中得
幸平陽主因奏子夫送入宮是為衛皇后
生男無喜生女無怒獨不見衛子夫霸天下

李延年歌

漢書外戚傳曰李延年性知音善歌舞武

帝愛之嘗侍上起舞而歌延年後為協律
都尉

北方有佳人絕世而獨立一顧傾人城再顧傾人國寧
不知傾城與傾國佳人難再得

李夫人歌

漢武帝

漢書外戚傳曰孝武李夫人本以倡進初
武帝愛其兄延年平陽主因言延年有女
弟帝乃召見之實妙麗善舞由是得幸夫

人少而蚤卒帝思念不已方士齊人少翁
言能致其神迺夜張燈燭設帷帳陳酒肉
而令帝居他帳遙望見好女如李夫人之
貌還幄坐而步又不得就視帝愈益相思
悲感為作詩令樂府諸音家弦歌之
是邪非邪立而望之偏何姍姍其來遲

同前

李商隱

一帶不結心兩股方安髻慙愧白茅人月沒教星替

刺結茱萸枝多擘秋蓮的獨自有波光綵囊盛不得
蠻絲繫條脫妍眼和香屑壽宮不惜鑄南人柔腸早被
秋眸割清澄有餘幽素香鰥魚渴鳳真珠房不知瘦骨
類冰井更許夜簾通曉霜土花漠漠雲茫茫黃河欲盡
天蒼黃

同前

李賀

紫皇宮殿重重開夫人飛入瓊瑤臺綠香繡帳何時歇
青雲無光宮水咽翩聯桂花墜秋月孤鸞驚啼商絲發

紅壁闌珊懸佩璫歌臺小妓遙相望玉蟾滴水雞人唱
露華蘭葉參差光

同前

鮑溶

璿閨羽帳華燭陳方士夜降夫人神歲蕤半露芙蓉色
窈窕將期環珮身麗如三五月可望難親近頓黛含犀
竟不言春思秋怨誰能問欲求巧笑如生時歌塵在空
瑟銜絲神來未及夢相見帝比初亡心更悲愛之欲其
生又死東流萬代無回水宮漏丁丁夜向晨烟銷霧散

愁方士

同前

張祜

延年不語望三星莫說夫人上涕零
爭奈世間惆悵在
甘泉宮夜看圖形

李夫人及貴人歌

陸厥

屬車桂席塵豹尾香烟滅形殿向
薜蘿青蒲復萎絕坐
萎絕對薜蘿臨丹階泣椒塗寡鶴羈
雌飛且止雕梁翠
壁網蜘蛛洞房明月夜對此淚如珠

未央才人歌

庾肩吾

從來守未央轉欲訝春芳
朝風凌日色夜月奪燈光
相逢儻游豫暫為卷衣裳

中山孺子妾歌二首

陸厥

漢書曰詔賜中山靖王子噲及孺子妾冰
未央才人歌詩四篇如淳曰孺子幼少稱
孺子妾宮人也顏師古曰孺子王妾之有
品號者妾王之衆妾也冰其名才人天子

內官按此謂以歌詩賜中山王及孺子妾
未央才人等爾累言之故云及也而陸厥
作歌乃謂之中山孺子妾失之遠矣藝文
志又曰臨江王及愁思節士歌詩四篇李
夫人及幸貴人歌詩三篇亦皆累辭也

未央才人中山孺子一笑傾城一顧傾市傾城不自美
傾市復為容願把陵陽袖披雲望九重

如姬寢卧內班婕

一作妾

坐同車洪波陪飲帳林光宴秦

餘歲暮寒飈及秋水落芙蓉子瑕矯後駕安陵泣前魚
賤妾終已矣一作賤妾思已畢君子定焉如

同前

李白

中山孺子妾特以色見珍雖然不如延年妹亦是當時
絕世人桃李出深井花豔驚上春一貴復一賤關天豈
由身芙蓉老秋霜團扇羞網塵戚姬髡髮入春市萬古
共悲辛

臨江王節士歌

陸厥

木葉下江波連秋月照浦雲歇山秋思不可裁復帶秋
風來秋風來已寒白露驚羅紈節士慷慨髮衝冠彎弓
挂若木長劍竦雲端

同前

李白

洞庭白波木葉稀鶯鴻始入吳雲飛吳雲寒鶯鴻苦風
號沙宿瀟湘浦節士感秋淚如雨白日常天心照之可
以事明主壯士憤雄風生安得倚天劍跨海斬長鯨

行幸甘泉宮

梁簡文帝

漢書曰武帝太始三年正月行幸甘泉宮
成帝永始四年正月行幸甘泉揚雄甘泉
賦曰迺命羣僚歷吉日協靈辰星陳而天
行乘輿登夫鳳凰兮而翳華芝駟蒼螭兮
六素虬劉歆甘泉宮賦曰軼陵陰之地室
過陽谷之秋城回天門而鳳舉躡黃帝之
明庭冠高山而為居乘崑崙而為宮王褒
甘泉宮頌曰甘泉山天下顯敞之名處也

前接大荆後臨北極左撫仁鄉右望素域
其為宮室也仍截薛而為觀攘抗岸以為
階覽除閣之麗美覺堂殿之巍巍按梁劉
孝威歌辭云避暑甘泉宮蓋與上之回同
意云

雉歸海水寂裘來重譯通吉行五十里隨處宿離宮鼓
聲恒入地塵飛上暗空赦書隨豹尾太史逐相風銅鳴
周國旒旗曳楚雲虹倖臣射覆罷從騎新歌終董桃拜

金紫賢妻侍禁中不羨神仙侶排烟逐駕鴻

同前

劉孝威

漢家迎夏畢避暑甘泉宮機車鳴里鼓駟馬駕相風校

尉烏丸

一作桓

騎待制樓煩宮

一作公

後旌遊五柞前笳度

九峻才人豹尾內御酒屬車中輦回百子閣扇動七輪

風鳴鍾休衛士披圖召後宮材官促校獵秋來

一作涼秋

戲

射熊

烏孫公主歌

漢書西域傳曰武帝元封中遣江都王建
女細君為公主以妻烏孫王昆莫公主至
其國自治宮室居歲時一再與昆莫會置
酒飲食昆莫年老言語不通公主悲乃自
作歌

吾家嫁我兮天一方遠託異國兮烏孫王穹廬為室兮
旃為牆以肉為食兮酪為漿居常土思兮心內傷願為
黃鵠兮歸故鄉

匈奴歌

十道志曰焉支祁連二山皆美水草匈奴
失之乃作此歌漢書曰元狩二年春霍去
病將萬騎出隴西討匈奴過焉支山千有
餘里其夏又攻祁連山捕首虜甚多祁連
山即天山匈奴呼天為祁連故曰祁連山
焉支山即燕支山也

失我焉支山令我婦女無顏色
失我祁連山使我六畜

不蕃息

驪駒歌

古辭

漢書儒林曰王式除為博士既至舍中會諸大夫共持酒肉勞式皆注意高仰之博士江公心嫉式謂歌吹諸生曰歌驪駒式曰聞之於師客歌驪駒主人歌客毋庸歸今日諸君為主人日尚早未可也驪駒者客欲去歌之故式以為言也

驪駒在門僕夫具存驪駒在路僕夫整駕

雜離歌

晨行梓道中梓葉相切磨與君別交中繡如新縑羅裂
之有餘絲吐之無還期

瓠子歌二首

西漢武帝

史記河渠書曰漢武帝既封禪乃使汲仁
郭昌發卒數萬人塞瓠子決河於是天子
已用事萬里沙還自臨決河沈白馬玉璧

令羣臣從官自將軍已下皆負薪寘決河
是時東郡以故薪柴少而下淇園之竹以
為棧天子既臨河決悼功之不成乃作歌
二章於是卒塞瓠子築宮其上曰宣房宮

瓠子決兮將奈何浩浩洋洋兮閭殫為河殫為河兮地
不得寧功無已時兮吾山平吾山平兮鉅野溢魚弗鬱
兮柏冬日正道弛兮離常流蛟龍騁兮方遠遊歸舊川
兮神哉沛不封禪兮安一作焉知外為我謂河伯兮不

仁泛濫不止兮愁吾人齧桑浮兮淮泗滿久不反兮水
維緩

河湯湯兮激潺湲北渡回兮迅流難
塞長茨兮湛美玉
河伯許兮薪不屬薪不屬兮衛人罪
燒蕭條兮噫乎何
以禦水隕林竹兮捷石菑宣房塞兮萬福來

李陵歌

漢書曰昭帝即位數年匈奴與漢和親漢
使求蘇武等單于許武還李陵置酒賀武

曰異域之人一別長絕因起舞而歌陵泣
下數行遂與武決

徑萬里兮度沙漠為君將兮奮匈奴路窮絕兮矢刃摧
士衆滅兮名已隕老母已死雖報恩將安歸

廣川王歌二首

漢書曰廣川王去繆王齊太子也有幸姬
王昭平王地餘許以為后後皆殺之更立
陽城昭信為后幸姬陶望卿為脩靡夫人

主繒帛崔脩成為明貞夫人主永巷昭信
復諧望卿疑有姦去以故不愛望卿後與
昭信等飲諸婢皆侍去為望卿作歌曰背
尊章使美人相和歌之後昭信諧殺望卿
欲擅愛曰王使明貞夫人主諸姬淫亂難
禁請閉諸姬舍門無令出教使其大婢為
僕射主永巷盡封閉諸舍上籥於后非大
置酒召不得見去憐之為作歌曰愁莫愁

令昭信聲鼓為節以教諸姬歌之按西京
雜記作廣川王去疾

背尊章嫖以忽謀屈竒起自絕行周流自生患諒非望
令誰怨

愁莫愁生無聊心重結意不舒內弗鬱憂哀積上不見
天生何益日崔隕時不再願棄軀死無悔

牢石歌

漢書佞幸傳曰元帝時石顯為中書令與

僕射牢梁少府五鹿充宗結為黨友諸附
倚者皆得寵位而民歌之言其兼官據勢
也

牢邪石邪五鹿客邪印何累累綬若若邪

黃鵠歌

漢昭帝

西京雜記曰始元元年黃鵠下太液池帝
為此歌按清商吳聲曲有黃鵠歌與此不

同

黃鵠飛兮下建章羽肅肅兮行蹌蹌金為衣兮菊為裳
唼喋荷荇出入蒹葭自顧菲薄愧爾嘉祥

黃門倡歌

漢書禮樂志曰成帝時鄭聲尤甚黃門名
倡丙疆景武之屬富顯於世隋書樂志曰
漢樂有黃門鼓吹天子宴羣臣之所用也
佳人俱絕世握手春樓點黛方初月縫裙學石榴君
王入朝罷爭競理衣裘

樂府詩集卷八十四

欽定四庫全書薈要卷一萬九千七百九十八集部

樂府詩集卷八十五

宋 郭茂倩 編

雜歌謠辭

歌辭

五侯歌

漢書曰成帝河平二年悉封舅大將軍王
鳳庶弟譚為平阿侯商成都侯立紅陽侯

根曲陽侯逢時高平侯五人同日封故世
謂之五侯時五侯羣弟爭為奢侈後庭姬
妾各數十人羅鍾磬舞鄭女作優倡狗馬
馳逐大治第室起土山漸臺洞門高廊閣
道連屬彌望百姓歌之言其奢僭如此按
傳稱成都侯穿長安城引內澧水注第中
大陂曲陽侯第園中土山漸臺類白虎殿
則穿城引水非曲陽與歌辭不同高都外

杜皆長安里名

五侯初起曲陽最怒壞決高都連竟外杜土山漸臺西
白虎

上郡歌

漢書曰成帝時馮野王為上郡太守其後
弟立亦自五原徙西河上郡立居職公廉
治行略與野王相似而多知有恩貸好為
條教吏民嘉美野王立相代為太守乃歌

之二云

大馮君小馮君兄弟繼踵相因循聰明賢知惠吏民政
如魯衛德化鈞周公康叔猶二君

燕王歌

漢書曰燕刺王旦武帝第四子也昭帝時
謀事不成妖祥數見燕倉知其謀告之由
是發覺王憂懣置酒萬載宮會賓客羣臣
妃妾坐飲王自歌華容夫人起舞坐者皆

泣王遂自殺

歸空城兮狗不吠
鷄不鳴
橫術何廣
廣兮固知國中之
無人

華容夫人歌

髮紛紛兮寘渠骨籍籍兮亡居母求死子兮妻求死夫
裴回兩渠間兮君子獨一作安居

廣陵王歌

漢書曰廣陵厲王胥武帝第五子也昭帝

時胥見帝年少無子有覬欲心迎女巫李
女須使下神祝詛宣帝即位祝詛事發覺
胥置酒顯陽殿召太子霸及子女董訾胡
生等夜飲使所幸八子郭昭君家人子趙
左君等鼓瑟歌舞王自歌左右悉涕泣奏
酒至雞鳴時罷

欲久生兮無終長不樂兮安窮奉天期兮不得須臾千
里馬兮駐待路黃泉下兮幽深人生要死何為苦心何

用為樂心所喜出入無怵為樂亟一作極萬里召兮郭門
閱死不得取代庸身自逝

鮑司隸歌

樂府廣題曰列異傳云鮑宣宣子永永子
昱三世皆為司隸而乘一驄馬京師人歌
之

鮑氏驄三人司隸再入公馬雖瘦行步工

五噫歌

三輔決錄曰梁鴻東出關過京師作五噫之歌肅宗聞而悲之求鴻不得

陟彼北邙兮噫顧瞻帝京兮噫宮闕崔巍兮噫民之劬勞兮噫遼遼未央兮噫

董少平歌

後漢書曰董宣字少平光武時為洛陽令搏擊豪彊京師號為卧虎而歌之云

枹鼓不鳴董少平

張君歌

後漢書曰張堪為漁陽太守捕擊姦猾賞
罰必信吏民皆樂為用乃於狐奴開稻田
八千餘頃勸民耕種以致殷富百姓歌之
桑無附枝麥穗兩歧張君為政樂不可支

廉叔度歌

後漢書曰廉范字叔度建初中為蜀郡太
守成都民物豐衍邑宇逼側舊制禁民夜

作以防火災而更相隱蔽燒者日屬范乃
毀削先令但嚴使儲水而已百姓為便乃
歌之云

廉叔度來何暮不禁火民安作平生無襦今五袴

范史雲歌

後漢書曰范冉字史雲桓帝時為萊蕪長
遭母喪不到官後於梁沛間徒行敝服賣
卜於市遭黨人禁錮遂推鹿車載妻子捃

拾自資或寓息客廬或依宿樹陰如此十
餘年乃治草堂而居焉所止單漏有時絕
粒閭里歌之及黨禁解為三府所辟乃應
司空命冉或作丹

甌中生塵范史雲釜中生魚范萊蕪

岑君歌

後漢書曰岑熙為魏郡太守招聘隱逸與
參政事無為而化視事二年與人歌之

我有枳棘岑君伐之我有蝨賊岑君過之狗吠不驚足
下生菴含哺鼓腹焉知凶災我喜我生獨丁斯時美矣
岑君於戲休茲

皇甫嵩歌

後漢書曰皇甫嵩為冀州牧請冀州一年
田租以贍飢民百姓歌之

天下大亂兮市為墟母不保子兮妻失夫賴得皇甫兮
復安居

郭喬卿歌

後漢書曰郭賀字喬卿建武中為尚書令
在職六年拜荊州刺史到官有殊政百姓
歌之顯宗巡狩到南陽特見嗟賞賜以三
公之服敕行部去檐帷使百姓見其容服
以章有德

厥德仁明郭喬卿中正朝廷上下平

賈父歌

後漢書曰中平元年交趾屯兵執刺史及
合浦太守自稱柱天將軍靈帝敕三府精
選能吏有司舉賈琮為交趾刺史琮到部
即移書告示各使安其資業百姓為之歌
賈父來晚使我先反今見清平吏不敢飯

朱暉歌

東觀漢記曰朱暉字文季再遷臨淮太守
吏民畏愛而為之歌

疆直自遂南陽朱季吏畏其威民懷其惠

劉君歌

後漢書曰劉陶舉孝廉除順陽長縣多姦
猾陶到官按發若神以病免吏民思而歌
之

邑然不樂思我劉君何時復來安此下民

洛陽令歌

長沙耆舊傳曰祝良字石卿為洛陽令歲

時亢旱天子祈雨不得良乃暴身階庭告
誠引罪自晨至中紫雲沓起甘雨登降人
為之歌

天久不雨蒸人失所天王自出祝令特苦精符感應滂
沱下雨

滎陽令歌

殷氏世傳曰殷褒為滎陽令廣築學館會
集朋徒民知禮讓乃歌之云

滎陽令有異政修立學校人易性令我子弟恥訟爭

徐聖通歌

會稽典錄曰徐弘字聖通為汝陰令誅鉏
姦築道不拾遺民乃歌之

徐聖通政無雙平刑罰姦宄空

王世容歌

吳錄曰王鐔字世容為武城令民服德化
宿惡奔迸父老歌之

王世容政無雙省徭役盜賊空

晉高祖歌

晉陽秋曰高祖伐公孫淵過故鄉賜牛酒
穀帛會父老故舊飲燕高祖作歌

天地開闢日月重光遭逢際會奉辭遐方將掃逋穢還
過故鄉肅清萬里總齊八荒告誠歸老待罪武陽

徐州歌

晉書曰王祥隱居廬江三十餘年不應州

郡之命後徐州刺史呂虔檄為別駕固辭
不受弟覽為具車牛虔乃召祥委以州事
于時寇盜充斥祥率勵兵士頻討破之州
界清靜政化大行時人歌之

海沂之康實賴王祥邦國不空別駕之功

東督歌

晉書曰東督陽平元城人太康中郡界大
旱督為邑人請雨三日而雨注衆謂督誠

感而為作歌

東先生通神明請天三日甘雨零我黍以育我稷以生
何以疇之報東長生

豫州歌

晉書曰祖逖為豫州刺史躬自儉約督課
農桑克已務施不畜資產子弟耕耘負擔
樵薪又收葬枯骨為之祭醞百姓感悅嘗
置酒大會耆老中坐流涕曰吾等老矣更

得父母死將何恨乃作此歌其得人心如此

幸哉遺黎免俘虜三辰既朗遇慈父玄酒忘勞甘瓠脯
何以詠思歌且舞

應詹歌

晉書曰王澄為荊州牧應詹督南平天門
武陵三郡軍事天下大亂詹境獨全百姓
歌之

亂離既替殆為灰朽僥倖之運賴茲應后歲寒不凋孤
境獨守拯我塗炭惠隆丘阜潤同江海恩猶父母

吳人歌

晉書曰鄧攸為吳郡守載米之官俸祿無
所受唯飲吳水而已及去郡百姓數千人
留牽攸船不得進乃以小舟夜中發去吳
人歌之

紉如打五鼓雞鳴天欲曙鄧侯挽不來謝令推不去

并州歌

樂府廣題曰晉汲桑力能扛鼎呼吸聞數
里殘忍少恩六月盛暑重裘累裊使人扇
之忽不清涼便斬扇者并州大姓田蘭薄
盛斬於平原士女慶賀奔走道路而歌之
士為將軍何可羞六月重茵披豹裘不識寒暑斷他頭
雄兒田蘭為報仇中夜斬首謝并州

隴上歌

晉書載記曰劉曜圍陳安于隴城安敗南走陝中曜使將軍平先丘中伯率勁騎追安安與壯士十餘騎於陝中格戰安左手奮七尺大刀右手執丈八蛇矛近交則刀矛俱發輒害五六遠則雙帶鞬服左右馳射而走平先亦壯健絕人與安搏戰三交奪其蛇矛而退遂追斬于澗曲安善於撫接吉凶夷險與衆同之及其死隴上為之

歌曜聞而嘉傷命樂府歌之

隴上壯士

一作健兒

有陳安軀幹雖小腹中寬愛養將士同

心肝驕驄父馬鐵瑕鞍七尺大刀奮如湍丈八蛇矛左

右盤十盪十決無當前戰始三交失蛇矛棄我驕驄竄

巖幽為我外援而懸頭西流之水東流河一去不還奈

子何

司馬將軍歌

李白

司馬將軍歌李白所作以代隴上健兒陳

安

狂風吹古月竊弄章華臺北落明星動光彩南征猛將
如雲雷手中電曳倚天劍直斬長鯨海水開我見樓船
壯心目頗似龍驤下三蜀揚兵習戰張虎旗江中白浪
如銀屋身居玉帳臨河魁紫髯若戟冠崔嵬細柳開營
揖天子始知灞上為嬰孩羌笛橫吹阿鞞回向月樓中
吹落梅將軍自起舞長劍壯士呼聲動九垓功成獻凱
見明主丹青畫像麒麟臺

鄭櫻桃歌

李頎

晉書載記曰石季龍勒之從子也性殘忍
勒為聘將軍郭榮之妹為妻季龍寵惑優
僮鄭櫻桃而殺郭氏更納清河崔氏櫻桃
又譖而殺之櫻桃美麗擅寵宮掖樂府由
是有鄭櫻桃歌

石季龍僭天祿擅雄豪美人姓鄭名櫻桃櫻桃美顏香
且澤娥娥侍寢專宮掖後庭卷衣三萬人翠眉清鏡不

得親官軍

一作庫

女騎一千匹繁花照耀漳河春織成花

映紅綸巾紅旗掣曳鹵簿新鳴輦走馬接飛鳥銅鈇琴
瑟隨去塵鳳陽重門如意館百尺金梯倚銀漢自言富
貴不可量女為公主男為王赤花雙簾珊瑚床盤龍斗
帳琥珀光滛昏偽位神所惡滅石者陵終不誤鄴城蒼
蒼白露微世事翻覆黃雲飛

襄陽童兒歌

晉書曰山簡永嘉中鎮襄陽時四方寇亂

朝野危懼簡優游卒歲唯酒是耽諸習氏
荆土豪族有佳園池簡每出嬉遊多之池
上置酒輒醉名之曰高陽池於是童兒皆
歌之有葛彊者簡之愛將家於并州故歌
云舉鞭向葛彊何如并州兒

山公出何許往至高陽池日夕倒載歸酩酊無所知時
時能騎馬倒著白接羅舉鞭向葛彊何如并州兒

襄陽歌

李白

落日欲沒峴山西倒著接羅花下迷襄陽小兒齋拍手

攔街爭唱白銅鞮傍人借問笑何事笑殺山公醉似泥

鷓鴣杓鸚鵡杯百年三萬六千日一日須傾三百杯遙

看漢水鴨頭綠恰似蒲萄初醱醅此江若變作春酒壘

麴便築糟丘臺千金駿馬換少妾醉坐雕鞍歌落梅車

傍側挂一壺酒鳳笙龍管行相催咸陽市上歎黃犬何

如月下傾金罍君不見晉朝羊公一片石

一作一片
古碑材

龜

龍剝落生莓苔淚亦不能為之墮心亦不能為之哀誰

能憂彼身後事金鳧銀鴨葬死灰清風朗月不用一錢
買玉山自倒非人推舒州杓力士鎗李白與爾同死生
襄王雲雨今安在江水東流猿夜聲

襄陽曲四首

李白

襄陽行樂處歌舞白銅鞮江城回淥水花月使人迷
山公醉酒時酩酊襄陽下頭上白接羅倒著還騎馬

峴山臨漢江水淥沙如雪

一作水色
如霜雪

上有墮淚碑青苔

久磨滅

且醉習家池莫看墮淚碑山公欲上馬笑殺襄陽兒

蘇小小歌

古辭

一曰錢塘蘇小小歌樂府廣題曰蘇小小
錢塘名倡也蓋南齊時人西陵在錢塘江
之西歌云西陵松柏下是也

我乘油壁車郎乘青驄馬何處結同心西陵松柏下

同前

李賀

幽蘭露如啼眼無物結同心烟花不堪翦草如茵松如

蓋風為裳水為佩
油壁車久相待
冷翠燭勞光彩
西陵下風吹雨

同前

溫庭筠

買蓮莫破券
買酒莫解金
酒裏春容抱
離恨水中蓮
子懷芳心
吳宮女兒腰
似束家在錢塘
小江曲一自檀郎
逐便風門前
春水年年綠

同前三首

張祜

車輪不可遮
馬足不可絆
長怨十字街
使郎心四散

新人千里去故人千里來
剪刀橫眼底方覺淚難裁
登山不愁峻涉海不愁深
中擘庭前棗教郎見赤心

河中之水歌

梁武帝

河中之水向東流
洛陽女兒名莫愁
莫愁十三能織綺
十四採桑南陌頭
十五嫁為盧郎婦
十六生兒似阿侯
盧家蘭室桂為梁
中有鬱金蘇合香
頭上金釵十二行
足下絲履五文章
珊瑚挂鏡爛生光
一作生輝光
平頭奴子
擎履箱
人生富貴何所望
恨不早嫁東家王

樂府詩集卷八十五

欽定四庫全書薈要卷一萬九千七百九十九

集部

樂府詩集卷八十六

宋 郭茂倩 編

新歌謠辭

歌辭

中興歌十首

鮑照

千冬逢一春萬夜視朝日生年值中興歡起百年畢
中興太平運化清四海樂祥景照玉臺紫烟遊鳳閣

碧樓含夜月紫殿爭朝光彩墀散蘭麝風起自生芳
白日照前窗玲瓏綺羅中美人掩輕扇含思歌春風
三五容色滿四五妙華歇已輸春日歡分隨秋光沒
北出湖邊戲前還苑中遊飛縠繞長松馳管逐波流
九月秋水清三月春花滋千金逐良日皆競中興時
窮泰已有分壽夭復屬天既見中興樂莫持憂自煎
襄陽是小地壽陽非帝城今日中興樂遙治在上京
梅花一時豔竹葉千年色願君松柏心採照無窮極

勞歌二首

伍緝之

莊子曰勞我以生佚我以老息我以死韓
詩曰飢者歌食勞者歌事若伍緝之云述
邈已窮極又云居身苦且危則勞生可知
矣

幼童輕歲月謂言可久長一朝見零悴歎息向秋霜述
邈已窮極疾痾復不康每恐先朝露不見白日光庶及
盛年時暫遂情所望吉辰既乖越來期眇未央促促歲

月盡窮年空怨

一作傷

女蘿依附松終已冠高枝浮萍生託水至死不枯萎傷
哉抱闕士獨無松與期月色似冬草居身苦且危幽生
重泉下窮年冰與澌多謝負郭生無所事六奇勞為社
下宰時無魏無知

同前

蕭 撝

百年能幾許公事罷平生寄言任立政誰憐李少卿

白日歌

張 融

張融歌序曰懸象著明莫大於日月而彼
日月不能不謝固知無準衰為盛之終盛
乃衰之始故為白日歌

白日白日舒天照暉數窮則盡盛滿而衰

雲歌

王臺卿

玉雲初度色金風送影來全生疑魄暗半去月時開欲
知無處所一為上陽臺

一旦歌

一旦被頭痛避頭還著牀自無親伴侶誰當給水漿
匍匐入山院正逢虎與狼對虎低頭啼垂淚淚千行

滎豫歌二首

酈道元水經注曰白帝山城水門之西江
中有孤石名滎豫石水冬出二十餘丈夏
則沒亦有裁出焉江水東逕廣峽溪乃三
峽首之也峽中有瞿塘黃龕二灘夏水回
復泝沂所忌十道志曰滎豫石與城郭門

外石潛通蜀人往燒火伏石則滄預邊沸
國史補曰蜀之三峽最號峻急四月五月
尤險故行者歌之滄或作濫預或作豫

濫預大如馬瞿塘不可下

濫預大如牛瞿塘不可流

同前

梁簡文帝

滄預大如鵬瞿塘不可觸金沙浮轉多桂浦忌經過

巴東三峽歌二首

酈道元水經注曰巴東三峽謂廣溪峽巫

峽西陵峽也三峽七百里中兩岸連山略

無闕處重巖疊嶂隱蔽天日非亭午夜分

不見日月其中有灘名曰黃牛江湍紆回

信宿猶見故行者謠曰朝發黃牛暮宿黃

牛三日三暮黃牛如故宜都山川記曰自

黃牛灘東入西陵界至峽口一百許里山

水紆曲林木高茂猿鳴至清山谷傳響冷

冷不絕行者聞之莫不懷土故漁者歌云

巴東三峽巫峽長猿鳴三聲淚沾裳

巴東三峽猿鳴悲猿鳴三聲淚沾衣

挾琴歌

范靜妻沈氏

逶迤起塵唱宛轉遶梁聲調弦可以進蛾眉畫未成

挾瑟歌

魏收

春風宛轉入曲房兼送小苑百花香白馬金鞍去未返
紅妝玉筯下成行

同前

陸龜蒙

挾瑟為君撫君嫌聲太古寥寥倚浪絲
嘒嘒沈相語賴有秋風知清冷吹玉柱

鄱陽歌二首

南史曰梁陸襄為鄱陽內史大同初郡人
鮮于琮結司徒殺廣晉令王筠有衆萬餘
人將出攻郡襄先已率人吏修城隍為備
及賊至破之生獲琮時鄰郡守宰案其黨

與皆不得實或有善人盡室罹禍唯襄郡
枉直無濫民乃作歌又有彭李二家因忿
爭相誣告襄引入內室不加責誚但和言
解喻之二人感恩深自悔咎乃為設酒食
令其盡歡酒罷同載而還因相親厚民因

歌之

解于抄後善惡分人無橫死賴陸君

陸君政無怨家鬪既罷讎共車

北軍歌

南史曰梁臨川靜惠王宏為揚州刺史天
監中武帝詔都督諸軍侵魏宏以帝之介
弟所領皆器甲精新軍容甚盛北人以為
百數十年所未之有軍次洛口前軍尅梁
城諸將欲乘勝深入宏聞魏接近畏懦不
敢進召諸將欲議旋師呂僧珍曰知難而
退不亦善乎停車不進魏人知其不武遺

以巾幗北軍乃歌之歌云韋武謂韋叡也
不畏蕭娘與呂姥但畏合肥有韋武

雍州歌

南史曰梁南平王偉子恪為雍州刺史年
少未閑庶務委之羣下百姓每通一辭數
處輸錢方得聞徹賓客有江仲舉蔡遠王
臺卿庾仲容四人俱被接遇竝有蓄積民
間歌之後達武帝帝因接末句云

江千萬蔡五百王新車庾大宅主人憤憤不知客

始興王歌

南史曰梁始興忠武王憺為都督荊州刺
史時天監初軍旅之後公私匱乏憺厲精
為政廣闢屯田減省力役供其窮困辭訟
者皆立待符教決於俄頃曹無留事下無
滯獄後徵還朝而民歌之荆土方言謂父
為爹故歌云人之爹也

始興王人之爹赴人急如水火何時復來哺乳我

夏侯歌

梁書曰夏侯夔為豫州刺史於蒼陵立堰
溉田千餘頃境內賴之夔兄亶先居此任
兄弟竝有恩惠百姓歌之夔在州七年遠
近多親附

我之有州賴彼夏侯前兄後弟布政優優

咸陽王歌

北史曰後魏咸陽王禧謀逆伏誅後宮人
為之歌其歌遂流於江表

可憐咸陽王奈何作事悞金牀玉几不能眠
夜起踏霜露洛水湛湛彌岸長行人那得度

鄭公歌

北史曰後魏鄭述祖為兗州刺史有人入
市盜布其父執之以歸述祖述祖特原之
自是境內無盜先是述祖之父道昭亦嘗

為兗州刺史故百姓歌之

大鄭公小鄭公相去五十載風教尚猶同

裴公歌

北史曰裴俠為河北郡守躬履儉素愛民
如子郡舊有漁獵夫三十人以供郡守俠
曰以口腹役人吾所不為也悉罷之又有
丁三十人供郡守役俠亦罷之不以入私
竝收庸為市官馬歲時既積馬遂成羣去

職之日一無所取民歌之云

肥鮮不食丁庸不取裴公貞惠為世規矩

長白山歌

北史曰來整榮國公護之子也尤驍勇善
撫御討擊羣賊所向皆捷諸賊歌之

長白山頭百戰場十五五把長槍不畏官軍千萬衆
只怕榮公第六郎

救勒歌

樂府廣題曰北齊神武攻周玉壁士卒死者十四五神武恚憤疾發周王下令曰高歡鼠子親犯玉壁劔弩一發元凶自斃神武聞之勉坐以安士衆悉引諸貴使斛律金唱敕勒神武自和之其歌本鮮卑語易為齊言故其句長短不齊

敕勒川陰山下天似穹廬籠蓋四野天蒼蒼野茫茫風吹草低見牛羊

同前

溫庭筠

敕勒金墮壁陰山無歲華帳外風飄雪營前月照沙
羌兒吹玉管胡姬踏錦花却笑江南客梅落不歸家

東征歌

王道

杜淹文中子世家曰隋仁壽中文中子西
遊長安見文帝奏太平十有二策帝下其
議於公卿公卿不悅文中子知謀之不用
作東征之歌而歸帝聞而再徵之不至

我思國家兮遠遊京畿忽逢帝王兮降禮布衣遂懷古
人之心兮將興太平之基時異事變兮志乖願違吁嗟
道之不行兮垂翅東歸皇之不斷兮將身西飛

薛將軍歌

唐書曰高宗時薛仁貴領兵擊九姓突厥
於天山時九姓有衆十餘萬令驍健數十
人逆來挑戰仁貴發三矢射殺三人自餘
一時下馬請降仁貴恐為後患竝坑殺之

九姓自此衰弱不復更為邊患於是軍中
歌之

將軍三箭定天山戰士長歌入漢關

顏有道歌

唐書曰顏遊秦師古叔父武德初為廉州
刺史時劉黑闥初平人多以彊暴寡禮風
俗未安遊秦撫恤境內敬讓大行邑里歌
之高祖璽書勉勞焉

廉州顏有道，姓行同莊老。愛人如赤子，不殺非時草。

新河歌

唐書曰：薛大鼎，貞觀中為滄州刺史。州界有無棣河，隋末填廢。大鼎奏開之，引魚鹽於海，百姓歌之。

新河得通舟楫利，直達滄海魚鹽至。昔日徒行今結駟，美哉薛公德滂被。

田使君歌

唐書曰田仁會永徽中為郢州刺史屬時
早仁會自曝祈禱竟獲甘澤其年大稔百
姓歌之

父母育我田使君精誠為人上天聞田中致雨山出雲
倉廩既實禮義申但願常在不憂貧

黃麈歌

唐書五行志曰如意初里中歌黃麈後契
丹李盡忠孫萬榮叛陷營州則天令總管

曹仁師王孝傑等將兵百萬討之大敗於
硤石黃羸谷而死朝廷嘉其忠為造此曲
後亦為舞曲

黃羸黃羸草裏藏彎弓射爾傷

得體歌

唐書曰天寶初韋堅為陝郡太守水陸轉
運使於長安城東漕水傍穿廣運潭以通
吳會數十郡舟楫若廣陵郡船即堆積廣

陵所出錦鏡銅器餘郡皆然舟人大笠寬
衫芒履如吳楚之製先是民間戲唱得體
歌至開元末田同秀上言見玄元皇帝云
有寶符在陝州桃林縣古關令尹喜宅遣
中使求得之以為殊祥改縣為靈寶及堅
鑿新潭成又致揚州銅器陝縣尉崔成甫
乃翻此詞為得寶歌集兩縣官伎女子唱
之成甫又作歌詞十章自衣缺胯綠衫錦

半臂偏袒膊紅抹額於第一船作號頭唱
之和者女子百人皆鮮服靚妝齊聲接影
鼓笛胡部以應之樂府雜錄曰得寶歌一
曰得寶子又曰得鞞子明皇初得太真妃
喜而謂後宮曰予得楊氏如得至寶樂府
遂作此曲二說不同

得體紇那也紇囊得體那潭裏船車鬧揚州銅器多三
郎當殿坐聽唱得體歌

得寶歌

得寶弘農野弘農得寶那潭裏船車鬧揚州銅器多三
郎當殿坐聽唱得寶歌

黃臺瓜辭

唐章懷太子

唐書曰武后生四子長曰孝敬皇帝弘為
太子監國而仁明孝悌武后方圖臨朝乃
殺孝敬立雍王賢為太子賢日懷憂惕知
必不保全無由敢言乃作黃臺瓜辭命樂

工歌之冀武后聞之感悟後終為武后所

逐死於黔中

一作高
宗武后

種瓜黃臺下瓜熟子離離
一摘使瓜好再摘令瓜稀
三摘尚自可摘絕抱蔓歸

古歌

沈佺期

落葉流風向玉臺
夜寒秋思洞房開
水晶簾外金波下
雲母窓前銀漢迴
玉階陰陰苔蘚色
君王履綦難再得
璇閨窈窕秋夜長
繡戶徘徊明月光
燕姬綵帳芙蓉色

秦子金爐蘭麝香北斗七星橫夜半清歌一曲斷君腸


同前二首

薛維翰

美人怨何深含情倚金閣不嘖復不語紅淚雙雙落
閉紅燭獨坐裁心錦頻放剪刀聲夜寒知未寢



樂府詩集卷八十六



總校官進士臣胡榮

校對官編修臣裴謙

謄錄監生臣邱桂蟾

欽定四庫全書薈要

集部

樂府詩集卷八十七

八



詳校官候選知縣臣吳甸華

欽定四庫全書薈要卷一萬九千八百 集部

樂府詩集卷八十七

宋 郭茂倩 編

雜歌謠辭

歌辭

潁川歌

漢書曰灌夫不好文學喜任俠已然諾諸
所與交通無非豪傑大猾家累數千萬食

客日數十百人陂池田園宗族賓客為權
利橫潁川潁川兒歌之

潁水清灌氏寧潁水濁灌氏族

庾公歌二首

晉書五行志曰庾亮初鎮武昌出至石頭百
姓於岸上歌之後連徵不入及薨還都葬焉

庾公上武昌翩翩如飛鳥庾公還揚州白馬牽旒旒
庾公初上時翩翩如飛鳥庾公還揚州白馬牽流蘇

御路楊歌

宋書五行志曰晉海西公太和中民為此
歌白者金行馬者國族紫為奪正之色明
以紫間朱也海西公尋廢三子非海西子
竝縊以馬韁死之明日南方獻甘露

青青御路楊白馬紫游韁汝非皇太子那得甘露漿

鳳凰歌

宋書五行志曰晉海西公生皇子百姓歌

之其歌甚美其音甚微海西公不男使左
右向龍與內侍接生子以為己子

鳳凰生一雛天下莫不喜本言是馬駒今定成龍子

黃曇子歌

溫庭筠

晉書五行志曰桓石民為荊州百姓忽歌
黃曇子曲後石民死王忱為荊州之應黃
曇子王忱字也按橫吹曲李延年二十八
解有黃覃子不知與此同否凡歌辭考之

與事不合者但因其聲而作歌爾

參差綠蒲短搖艷雲

一作春

塘滿紅潏蕩融融鶯翁鷓鴣

暖萋芊小城路馬上脩蛾懶羅衫裊向風點粉金鷓卵

歷陽歌

晉書五行志曰庾楷鎮歷陽百姓歌之後
楷南奔桓玄為玄所殺

重羅黎重羅黎使君南上無還時

符堅時長安歌

晉書載記曰苻堅既滅燕慕容沖姊偽清
河公主年十四有殊色堅納之寵冠後庭
沖年十二亦有龍陽之資堅又幸之姊弟
專寵宮人莫進長安歌之咸懼為亂王猛
切諫堅乃出沖後竟為沖所敗

一雌復一雄雙飛入紫宮

王子年歌二首

南史曰齊太祖高皇帝諱道成姓蕭氏未

受命時王子年作此歌案穀中精細者稻也即道也熟猶成也金刀劉字刈猶翦也欲知其姓草肅肅穀中最細低頭熟鱗身甲體永興福金刀利刃齊刈之

邯鄲郭公歌

樂府廣題曰北齊後主高緯雅好傀儡謂之郭公時人戲為郭公歌及將敗果營邯鄲高郭聲相近九十九末數也滕口鄧林

也大兒謂周帝太祖子也高岡後主姓也
雉鷄類武成小字也後敗於鄧林盡如歌
言蓋語妖也

邯鄲郭公九十九技兩漸盡入滕口大兒緣高岡雉子
東南走不信吾言時當看歲在酉

邯鄲郭公辭

溫庭筠

金笳悲故曲玉座積深塵言是邯鄲伎不易鄴城人青
苔竟埋骨紅粉自傷神唯有漳河柳還向舊營春

齊雲觀歌

隋書五行志曰陳後主造齊雲觀國人歌
之功未畢而為隋師所虜

齊雲觀寇來無際畔

周宣帝歌

隋書五行志曰周宣帝與宮人夜中連臂
蹋踉而歌

自知身命促把燭夜行遊

謠辭

黃澤辭

穆天子傳曰天子東遊於黃澤使宮樂謠
云

黃之陔其馬歛沙皇人威儀黃之澤其馬歛玉皇人壽
殺

白雲謠

穆天子傳曰天子觴西王母於瑤池之上

西王母為天子謠天子荅之

白雲在天山陵自出道里悠遠山川間之將子無死向
復能來

穆天子謠

予歸東土和治諸夏萬民平均吾顧見汝比及三年將
復而野

越謠歌

古辭

君乘車我帶笠他日相逢下車揖君擔簦我跨馬他日

相逢為君下

長安謠

漢書佞倖傳曰成帝初石顯與妻子徙歸
故鄉其黨牢梁陳順皆免官諸所交結以
顯為官皆廢罷少府五鹿充宗左遷玄菟
太守御史中丞伊嘉為雁門都尉長安謠
云

伊徙雁鹿徙兔去牢與陳實無價

城中謠

後漢書曰前世長安城中謠言改政移風
必有其本上之所好下必甚焉

城中好高髻四方高一尺城中好廣眉四方且半額城
中好大袖四方全匹帛

會稽童謠

後漢書曰張霸永元中為會稽太守時賊
未解郡界不寧乃移書開購明用信賞賊

遂束手歸附不煩士卒之力於是有童謠
棄我戟捐我矛盜賊盡吏皆休

二郡謠

後漢書曰汝南太守宗資任功曹范滂南
陽太守成瑨亦委功曹岑暉范滂字孟博
岑暉字公孝二郡為謠

汝南太守范孟博南陽宗資主畫諾南陽太守岑公孝
弘農成瑨但坐嘯

京兆謠

續漢書曰李燮拜京兆詔發西園錢燮上封事遂止不發吏民愛敬乃為此謠

我府君道教舉恩如春威如虎剛不吐弱不如愛如母
訓如父

後漢桓靈時謠

後漢書曰桓靈之世更相濫舉人為之謠
舉秀才不知書察孝廉父別居

吳謠

吳志曰周瑜少精意於音樂雖三爵之後
其有闕誤瑜必知之知之必顧故時人謠
云

曲有誤周郎顧

晉泰始中謠

晉書曰泰始中人為賈充等謠言亡魏而
成晉也

賈裴王亂紀綱王裴賈濟天下

閣道謠

晉書曰潘岳才名冠世為衆所疾後為河陽令而鬱鬱不得志時尚書僕射山濤領吏部王濟裴楷等並為帝所親遇岳內非之乃題閣道為謠

閣道東有大牛王濟鞅裴楷鞵和嶠刺促不得休

南土謠

王隱晉書曰杜預為鎮南大將軍都督荊州諸軍事南土美而謠之

後世無叛由杜翁孰識智名與勇功

宋時謠

南史曰宋時用人乖實有謠云

上車不落為著作體中何如作祕書

宋大明中謠

南史曰大明中有奚顯度者為員外散騎

侍郎孝武嘗使主領人功而苛虐無道動
加捶撻暑雨寒雪不聽暫休人不堪命或
自經死時建康縣考囚或用方材壓額及
踝脛故民間有此謠又相戲曰勿反顧付
奚度其暴酷如此

寧得建康壓額不能受奚度拍

山陰謠

南史曰丘仲孚為山陰令居職甚有聲稱

而百姓為此謠前世傅琰父子沈憲劉玄
明相繼宰山陰並有政績言仲孚皆過之
也

二傅沈劉不如一丘

梁時童謠

南史曰臨賀郡王正德性凶慝其後梁室
傾覆既由正德百姓至聞臨賀郡名亦不
欲道其惡之如是故有童謠

寧逢五虎入市不欲見臨賀父子

曲堤謠

北史曰宋世良為清河太守才識閒明尤善政術郡東南有曲堤羣盜所萃世良施八條之制盜奔它境而民為此謠

曲堤雖險賊何益但有宋公自屏跡

趙郡謠

北史曰後魏李孝伯父曾道武時為趙郡

太守令行禁止并州丁零數為山東害知
曾能得百姓死力不敢入境賊於常山界
得一死鹿賊長為趙郡地也責之還令送
鹿故處其見憚如此郡人為之謠

詐作趙郡鹿猶勝常山粟

北齊太上時童謠

千金買藥園中有芙蓉樹破家不分明蓮子隨它去

獨酌謠四首

陳後主

陳後主序曰齊人淳于髡善為十酒偶效
之作獨酌謔

獨酌謔獨酌且獨謔一酌宜陶暑二酌斷風飈三酌意
不暢四酌情無聊五酌孟易覆六酌懽欲調七酌累心

去八酌高志

一作德

超九酌忘物我十酌忽凌霄凌霄異

羽翼任致得飄飄寧學世人醉揚波去我遙爾非浮丘
伯安見王子喬

獨酌謔獨酌起中宵中宵照春月初花發春朝春花春

月正徘徊一罇一弦當夜開聊奏孫登曲仍斟畢卓杯
羅綺徒紛亂金翠轉遲回中心更如水凝志本同灰道
遙自可樂世語世情哉

獨酌謔獨酌酒難消獨酌三兩盃弄曲兩三調調弦忽
未畢忽值出房朝更似遊春苑還如逢麗譙衣香逐嬌
去眼語送杯嬌餘罇盡復益自得是逍遙

獨酌謔獨酌一樽酒樽酒傾未酌明月正當牖是牖非
園甕吾樂非擊缶自任物外惟更齊椿菌久卷舒乃一

卷忘情且十斗寧復語綺羅因情即山藪

同前

陸瑜

獨酌謔芳氣饒一傾蕩神慮再酌動神飈忽逢鳳樓下
非待鸞弦招窗明影乘入人來香逆飄杯隨轉態盡釧
逐畫杯搖桂宮非蜀郡當壚也至宵

同前

沈炯

獨酌謔獨酌謔獨酌獨長謔智者不我顧愚夫余不要
不愚復不智誰當余見招所以成獨酌一酌一傾瓢生

涯本漫漫神理暫超超再酌矜許史三酌傲松喬頻煩
四五酌不覺凌丹霄倏爾厭五鼎俄然賤九韶彭殤無
異葬夷跖可同朝龍蠖非不屈鵬鷃本逍遙寄語號叟
侶無乃太塵囂

羈謠

孔仲智

芳杜觴春酒髣髴傷山時徒歌不成樂空以羈自悲羈
傷懷土心遽復還山路迨及春復時無使春光算

筮篋謠

結交在相得骨肉何必親
甘言無忠實世薄多蘇秦
從風暫靡草富貴上昇天
不見山巔樹推扞下為薪
宜甘井中泥上出作埃塵

同前

李白

攀天莫登龍走山莫騎虎
貴賤結交心不移唯有嚴陵
及光武周公稱大聖管蔡寧
相容漢謠一斗粟不與淮
南春兄弟尚路人吾心安
所從它人方寸間山海幾千
重輕言託朋友對面九疑
峯多花必早落桃李不如松

管鮑久已死何人繼其蹤

玉漿泉謠

隋書曰豆盧勣為渭州刺史甚有惠政華
夷悅服大致祥瑞烏鼠山俗呼為高武隴
其下渭水所出其山絕壁千尋由來乏水
諸羌苦之勣馬足所踐忽飛泉湧出有白
鳥翔止廳前乳子而後去民為之謠後因
號其泉曰玉漿泉

我有丹陽山出玉漿濟我人夷神烏來翔

鄴城童子謠

李賀

鄴城中莫塵起將黑丸斫文吏棘為鞭虎為馬團團走
鄴城下切玉劍射日弓獻何人奉相公扶轂來閣右兒
香掃塗相公歸

唐天寶中京兆謠

唐書曰李峴為京兆尹甚著聲績天寶中
連雨六十餘日宰臣楊國忠惡其不附已

以雨災歸京兆尹乃出為長沙太守時京
師米麥踊貴百姓為之謠其為政得人心
如此

欲得米麥賤無過追李峴

樂府詩集卷八十七

欽定四庫全書薈要卷一萬九千八百一

集部

樂府詩集卷八十八

宋 郭茂倩 編

雜歌謠辭

謠辭

堯時康衢童謠

列子曰堯治天下五十年不知天下之治
與不治億兆之願戴已與不願戴已顧問

左右外朝及在野皆不知也堯乃微服游於康衢聞童兒謠堯喜問曰誰教爾為此言童兒曰聞之大夫大夫曰古詩也堯還宮召舜因禪以天下舜不辭而受之

立我烝民莫匪爾極不識不知順帝之則

晉獻公時童謠

春秋左氏傳曰晉獻公伐虢圍下陽問於卜偃曰吾其濟乎偃以童謠對曰克之十月丙

子旦日在尾月枉策鷄火中必是時也冬十
二月丙子朔晉滅虢虢公醜奔京師漢書五
行志曰周十二月夏十月也言天者以夏正
丙之晨龍尾伏辰衲服振振取虢之旂鷄之奔奔天策
焯焯火中成軍虢公其奔

晉惠公時童謠

漢書五行志曰晉惠公賴秦力得立立而
背秦內殺二大夫國人不說及愛葬其兄

恭太子申生而不敬故詩妖作也後與秦戰為秦所獲立十四年而死晉人絕之更立其兄重耳是為文公遂伯諸侯

恭太子更葬兮後十四年晉亦不昌昌乃在其兄

魯國童謠

漢書五行志曰左氏傳魯文成之世童謠也至昭公時有鸚鵡來巢公攻季氏敗出奔齊居外野次乾侯八年死於外歸葬魯

昭公名裯公子宋立是為定公

鸛之鵠之公出辱之鸛鵠之羽公在外野往饋之馬鸛
鵠跣跣公在乾侯徵蹇與襦鸛鵠之巢遠哉遙遙裯父
喪勞宋父以驕鸛鵠鵠往歌來哭

楚昭時童謠

家語曰楚昭王渡江江中有物大如斗圓
而赤直觸王舟舟人取之王大怪之遍問
羣臣莫之能識王使使聘於魯問於孔子

孔子曰此為萍實也可剖而食之吉祥也
唯霸者為能獲焉使者反王遂食之大美
久之使來以告魯大夫大夫因子游問曰
夫子何以知其然曰吾昔之鄭過乎陳之
野聞童謠此楚王之應也是以知之

楚王渡江得萍實大如斗赤如日剖而食之甜如蜜

周末時童謠

家語曰齊有一足之鳥飛習於公朝下止

於殿前舒翅而跳齊侯大怪之使使聘魯
問於孔子孔子曰此鳥名曰商羊水祥也
昔童兒有屈其一脚振訊兩眉而跳且謠
今齊有之其應至矣急告民趨治溝渠脩
隄防將有大水為災頃之大霖雨水溢泛
諸國傷害民人唯齊有備不敗

天將大雨商羊鼓儻

漢元帝時童謠

漢書五行志曰元帝時童謠至成帝建始二年三月戊子北宮中井泉稍上溢出南流井水陰也竈烟陽也玉堂金門至尊之居象陰盛而滅陽竊有宮室之應也王莽生於元帝初元四年至成帝封侯為三公輔政因以篡位也

井水溢滅竈烟灌玉堂流金門

漢成帝燕燕童謠

漢書五行志曰成帝時童謠後帝為微行
出游常與富平侯張放俱稱富平侯家人
過陽阿主作樂見舞者趙飛鸞而幸之故
曰燕燕尾涎涎美好貌也張公子謂富平
侯也木門倉琅根為宮門銅鍤言將尊貴
也後遂立為皇后與弟昭儀賊害後宮皇
子卒皆伏辜所謂燕飛來啄皇孫皇孫死
燕啄矢者也

燕燕尾涎涎張公子時相見木門倉琅根燕飛來啄皇
孫皇孫死燕啄矢

漢成帝時歌謠

漢書五行志曰成帝時歌謠也桂赤色漢
家象華不實無繼嗣也王莽自謂黃象黃
爵巢其顛也

邪徑敗良田讒口亂善人桂樹華不實黃爵巢其顛故
為人所羨今為人所憐

王莽時汝南童謠

漢書曰汝南舊有鴻隙大陂郡以為饒成
帝時關東數水陂溢為害翟方進為相與
御史大夫孔光共遣掾行視以為決去陂
水其地肥美省隄防費而無水憂遂奏罷
之及翟氏滅鄉里歸惡言方進請陂下良
田不得而奏罷陂王莽時常枯旱郡中追
怨方進時有童謠子威方進字也

壞陂誰翟子威飯我豆食羹芋魁反乎覆陂當復誰云
者兩黃鵠

夏始時南陽童謠

後漢書五行志曰夏始時南陽有童謠是
時夏始在長安世祖為大司馬平定河北
夏始大臣並僭專權故謠妖作也後夏始
遂為赤眉所殺是夏始之不諧在赤眉也
世祖自河北興

諧不諧在赤眉得不得在河北

後漢時蜀中童謠

後漢書五行志曰世祖建武六年蜀中童謠是時公孫述僭號於蜀時人竊言王莽稱黃述欲繼之故稱白五銖漢家貨明當復也述遂誅滅

黃牛白腹五銖當復

後漢順帝末京都童謠

後漢書五行志曰順帝之末京都童謠按
順帝即世孝質短祚大將軍梁冀貪樹疏
幼以為己功專國號令以贍其私太尉李
固以為清河王雅性聰明敦詩悅禮加又
屬親立長則順置善則固而冀建白太后
策免固徵蠡吾侯遂即至尊固是月幽斃
於獄暴屍道路而太尉胡廣封安樂鄉侯
司徒趙戒厨亭侯司空袁湯安國亭侯

直如弦死道邊曲如鉤反封侯

後漢桓帝初小麥童謠

後漢書五行志曰桓帝之初天下童謠按
元嘉中涼州諸羌一時俱反南入蜀漢東
抄三輔延及并冀大為民害命將出衆每
戰常負中國益發甲卒麥多委棄但有婦
女獲刈之也吏買馬君具車者言調發重
及有秩者也請為諸君鼓隴胡者不敢公

言私咽語也

小麥青青大麥枯誰當穫者婦與姑丈人何在西擊胡
吏買馬君具車請為諸君鼓隴胡

大麥行

杜甫

大麥乾枯小麥黃婦女行泣夫走藏東至集壁西梁洋
問誰腰鎌胡與羌宜無蜀兵三千人部領辛苦江山長
安得如鳥有羽翅託身白雲還故鄉

後漢桓帝初城上烏童謠

後漢書五行志曰桓帝之初京都童謠按此皆謂為政貪也城上烏尾畢逋者處高利獨食不與下共謂人主多聚斂也公為吏子為徒者言蠻夷將畔逆父既為軍吏其子又為卒徒往擊之也一徒死百乘車者言前一人往討胡既死矣後又遣百乘車往車班班入河間者言桓帝將崩乘輿班班入河間迎靈帝也河間姁女工數錢

以錢為室金為堂者靈帝既立其母永樂

太后好聚金以為堂也石上慊慊春黃梁

言永樂唯積金錢慊慊常若不足使人春

黃梁而食之也梁下有懸鼓我欲擊之丞

相怒者言永樂教靈帝使賣官受錢所祿

非其人天下忠篤之士怨望欲擊懸鼓以

求見丞相主鼓者亦復諂順怒而止我也

劉昭以為此謠後驗竟為靈帝作言一徒

似斥桓帝帝貴任羣閣參委機政左右前
後莫非刑人有同囚徒之長故言寄一徒
也且又弟則廢黜身無嗣塊然單獨非一
而何百乘車者乃國之君解犢後徵正膺
斯數繼以班班尤得以類焉解犢靈帝所
封也

城上烏尾畢逋公為吏子為徒一徒死百乘車車班班
入河間河間姪女工數錢以錢為室金為堂石上慊慊

春黃梁梁下有懸鼓我欲擊之丞相怒

後漢桓帝初京都童謠

後漢五行志曰桓帝之初京都童謠至延熹末鄧皇后以譴自殺乃以竇貴人代之其父名武字游平拜城門校尉及太后攝政為大將軍與太傅陳蕃合心戮力惟德是建印綬所加咸得其人豪賢大姓皆絕望矣

游平賣印自有平不避豪賢及大姓

後漢桓帝末京都童謠

後漢書五行志曰桓帝之末京都童謠按
解犢亭屬饒陽河間縣也居無幾何而桓
帝崩使者與解犢侯皆白蓋車從河間來
延延衆貌是時御史劉儵建議立靈帝以
儵為侍中中常侍侯覽畏其親近必當間
已白拜儵泰山太守因令司隸迫促殺之

朝廷少長思其功效乃拔用其弟郤致位
司徒此為合諧也劉昭按郡國志饒陽本
屬涿後屬安平靈帝既是河間王曾孫謠
言自是有徵無俟河間之縣為驗也

白蓋小車何延延河間來合諧河間來合諧

後漢靈帝末京都童謠

後漢書五行志曰靈帝之末京都童謠至
中平六年少帝登躡至尊獻帝未有爵號

為中常侍段珪等所執公卿百官皆隨其
後到河上乃得來還此為非侯非王上北
邙者也

侯非侯王非王千乘萬騎上北邙

後漢獻帝初童謠

後漢書五行志曰獻帝初童謠公孫瓚以
為易地當之遂徙鎮焉乃脩城積穀以待
天下之變建安三年袁紹攻瓚瓚大敗縊

其姊妹妻子引火自焚紹兵趣登臺斬之
初瓚破黃巾殺劉虞乘勝南下侵據齊地
雄威大振而不能開廓遠圖欲以堅城觀
時坐聽圍戮斯亦自易地而去世也

燕南垂趙北際中央不合大如礪唯有此中可避世

後漢獻帝初京都童謠

後漢書五行志曰獻帝之初京都童謠按
千里草為董十日卜為卓凡別字之體皆

從上起左右離合無有從下發端者也今
二字如此者天意若曰卓自下摩上以臣
陵君也青青暴盛之貌不得生者亦旋破
亡也

千里草何青青十日卜不得生

魏明帝景初中童謠

宋書五行志曰魏明帝景初中童謠及宣
王平遼東歸至白屋當還鎮長安會帝疾

篤急召之乃乘追鋒車東渡河終翦魏室
如童謠之言也

阿公阿公駕馬車不意阿公東渡河阿公東還當柰何
魏齊王嘉平中謠

宋書五行志曰魏齊王嘉平中謠按朱虎
者楚王彪小字也王陵令狐愚聞此謠謀
立彪事發陵等伏誅彪賜死

白馬素羈西南馳其誰乘者朱虎騎

吳孫亮初童謠

宋書五行志曰吳孫亮初童謠按楊子閣者反語石子垵也鈎絡鈎帶也及諸葛恪死果以葦席裹身箴束其腰投之石子垵後聽恪故吏收葬求之此垵云

吁汝恪何若若蘆葦單衣箴鈎絡於何相求楊子閣

吳孫亮初白鼈鳴童謠

宋書五行志曰吳孫亮初公安有白鼈鳴

童謠按南郡城可長生者有急易以逃也
明年諸葛恪敗弟融鎮公安亦見藁融刮
金印龜服之而死鼃有鱗介甲兵之象也
白鼃鳴龜背平南郡城中可長生守死不去義無成

白鼃鳴

張籍

天欲雨有東風南谿白鼃鳴窟中六月人家井無水夜
間白鼃人盡起

吳孫皓初童謠

宋書五行志曰吳孫皓初童謠按皓尋遷
都武昌民泝流供給咸怨毒焉

寧飲建業水不食武昌魚寧還建業死不止武昌居

吳孫皓天紀中童謠

宋書五行志曰吳孫皓天紀中童謠晉武
帝聞之加王濬龍驤將軍及征吳江西衆
軍無過者而王濬先定秣陵

阿童復阿童銜刀遊渡江不畏岸上虎但畏水中龍

晉武帝太康後童謠三首

宋書五行志曰晉武帝太康後江南童謠
於時吳人皆謂在孫氏子孫故竊發為亂
者相繼按橫目者四字自吳亡至晉元帝
興幾四十年皆如童謠之言元帝懦而少
斷局縮肉直斥之也干寶云不知所斥諱
之也

局縮肉數橫目中國當敗吳當復

宮門柱且莫朽吳當復在三十年後
鷄鳴不拊翼吳復不用力

晉惠帝永熙中童謠

晉書五行志曰惠帝永熙中童謠時楊駿
專權楚王用事故言荆筆楊板二人不誅
則君臣禮悖故云幾作驢也

二月末三月初荆筆楊板行詔書宮中人馬幾作驢
晉惠帝元康中京洛童謠二首

晉書五行志曰惠帝元康中京洛童謠南

風賈后字也白晉行也沙門太子小字也

魯賈謚國也言賈后將與謚為亂以危太子而趙王因釁咀嚼豪賢以成篡奪也按

賈后傳有此謠云南風烈烈吹黃沙遙望魯國鬱嵯峨前至三月滅汝家與五行志所載不同其後賈謚既誅賈后尋亦廢死宋書五行志曰是時愍懷頗失衆望卒以

廢黜不得其死焉

南風起吹白沙遙望魯國何嗟我千歲髑髏生齒牙
城東馬子莫隴叟比至來年纏汝髮

晉元康中洛中童謠

宋書五行志曰晉元康中趙王倫既篡洛
中有童謠數月而齊王成都河間義兵同
會誅倫按成都西蕃而在鄴故曰虎從北
來齊東蕃而在許故曰龍從南來河間水

匯而在關中故曰水從西來齊留輔政居
宮西有無君之心故曰登城看也

虎從北來鼻頭汗龍從南來登城看水從西來何濯濯
晉惠帝時洛陽童謠

晉書曰惠帝時洛陽童謠明年而夷賊石
勒劉羽反

鄴中女子莫千妖前至三月抱胡腰

晉惠帝大安中童謠

宋書五行志曰晉惠帝大安中童謠其後
中原大亂宗蕃多絕唯琅邪汝南西陽南
頓彭城同至江表而元帝嗣晉矣

五馬游渡江一馬化為龍

晉懷帝永嘉初謠

晉書五行志曰苟晞將破汲桑時有此謠
司馬越由是惡晞奪其兗州隙難遂構焉
按列傳東海孝獻王越字元起懷帝永嘉

初出鎮許昌自許昌率苟晞及冀州刺史
丁劭討汲桑破之越還於許長史潘滔說
之曰兗州天下樞要公宜自牧乃轉苟晞
為青州刺史由是與晞有隙

元超兄弟大洛度上桑打椹為苟作

晉懷帝永嘉初童謠

晉書五行志曰司馬越還洛時童謠也按
列傳越既與苟晞構怨尋詔越為丞相領

兗州牧督兗豫司冀幽并六州越辭丞相
不受自許遷於鄆城移屯濮陽又遷於滎
陽後自滎陽還洛帝紀曰永嘉三年三月
丁巳東海王越歸京師是也

洛中大鼠長尺二若不早去大狗至

晉永嘉中童謠

三十國春秋曰永嘉中童謠也

秦川中血沒腕唯有涼州倚柱觀

晉明帝大寧初童謠

晉書五行志曰明帝太寧初童謠及明帝崩成帝幼為蘇峻所逼遷于石頭御膳不足此大馬死小馬餓也高山峻也言峻尋死石峻弟蘇石也峻死後石據石頭尋亦破此山崩石破之應也

惻惻力力放馬山側大馬死小馬餓高山崩石自破

晉哀帝隆和初童謠

晉書五行志曰哀帝隆和初童謠朝廷聞而惡之改年曰興寧民復歌曰雖復改興寧亦復無聊生哀帝尋崩升平五年而穆帝崩不滿斗不至十年也

升平不滿斗隆和那得久桓公入石頭陛下徒跣走

晉太和末童謠

晉書五行志曰太和末童謠及海西公被廢百姓耕其門以種小麥遂如謠言


犁牛耕御路白門種小麥

晉孝武太元末京口謠

晉書五行志曰孝武帝太元末京口謠尋
王恭起兵誅王國寶旋為劉牢之所敗故
言拉颯棲也

黃雌雞莫作雄父啼一旦去毛衣被拉颯棲

樂府詩集卷八十八



總校官進士臣胡榮

校對官編修臣裴謙

謄錄監生臣范桐

欽定四庫全書薈要

集部

樂府詩集卷

八十九至
九十一

詳校官候選知縣臣吳甸華



欽定四庫全書薈要卷一萬九千八百二

集部

樂府詩集卷八十九

宋 郭茂倩 編

雜歌謠辭

謠辭

晉安帝元興初童謠

宋書五行志曰晉桓玄既篡有此童謠及
玄敗走至江陵五月中誅如其期焉時又

有民謠云征鍾落地桓迸走征鍾至穢之
服桓四體之下稱玄自下居上猶征鍾之
厠歌謠下體之詠民口也而云落地墜地
之祥迸走之言其驗明矣按帝紀桓玄篡
位在安帝元興二年十二月也

草生及馬腹烏啄桓玄目

晉安帝元興中童謠

宋書五行志曰晉安帝元興中桓玄既得

志而有童謠及玄敗走而諸桓悉誅焉郎
君司馬元顯也

長干巷巷長干今年殺郎君明年斬諸桓

晉安帝義熙初童謠

晉書五行志曰安帝義熙初童謠時官養
盧龍寵以金紫奉以名州養之已極而龍
不能懷我好音舉兵內伐遂成讐敵也及
敗斬伐其黨如草木之成積焉按列傳盧

循小字元龍元興二年寇廣州逐刺史吳
隱之自攝州事號平南將軍安帝乃假循
征虜將軍廣州刺史義熙中劉裕破循于
豫章循走交州為刺史杜慧度所殺

官家養蘆化成荻蘆生不止自成積

晉安帝義熙初謠二首

宋書五行志曰盧龍據有廣州民間有謠
後擁上流數州之地內逼京輦應天半之

言時復有謠言龍後果敗不得入石頭矣
蘆生漫漫竟天半

盧橙橙逐水流東風忽如起那得入石頭

晉吳中童謠

宋書五行志曰晉庾羲在吳郡時吳中童
謠無幾而庾羲王洽相繼亡

寧食下湖苻不食上湖蓴庾吳沒命喪復殺王領軍

晉荊州童謠

晉書五行志曰殷仲堪在荊州時童謠未
幾而仲堪敗桓玄遂有荊州

芒籠目繩縛腹殷當敗桓當復

晉京口謠

宋書五行志曰晉王恭鎮京口誅王國寶
百姓為此謠按昔年食白飯言得志也今
年食麥麩麥麩麤穢其精已去明將敗也
天公將加譴謫而誅之也捻嚨喉氣不通

死之祥也敗復敗丁寧之辭也恭尋死京
都大行咳疾而喉並喝焉

昔年食白飯今年食麥麩天公誅謫汝教汝捻嚨喉嚨
喉喝復喝京口敗復敗

晉京口民間謠二首

宋書五行志曰晉王恭在京口民間忽有
此謠按黃字上恭字頭也小人恭字下也

尋如謠言

黃頭小人欲作賊阿公在城下指縛得

黃頭小人欲作亂賴得金刀作蕃扞

符堅時長安謠

晉書載記曰符堅時長安有此謠堅以鳳凰非梧桐不棲非竹實不食乃植桐竹數十萬株於阿房城以待之後堅為慕容沖所敗入止阿房城焉鳳凰沖小字也

鳳凰鳳凰止阿房

苻堅初童謠

晉書五行志曰苻堅初有此童謠及堅敗於淝水為姚萇所殺在偽位凡三十年

阿堅連牽三十年後若欲敗時當在江湖邊

苻堅時童謠

晉書載記曰苻堅彊盛時有此童謠堅聞而惡之每征伐戒軍候云有新城者避之後因壽陽之敗其國大亂竟死於新城佛

寺五行志曰時復有謠云魚羊田斗當滅
秦識者以為魚羊鮮也田斗卑也堅自號
秦言滅之者鮮卑也其羣臣諫堅令盡誅
鮮卑堅不從及淮南敗還初為慕容沖所
攻又為姚萇所殺身死國滅云

河水清復清符詔死新城

宋元嘉中魏地童謠

南史曰宋元嘉二十七年魏太武帝圍汝南

成文帝遣臧質北救至盱台太武已過淮自
廣陵返攻盱台就質求酒質封漉便與之且
報書云不聞童謠言邪虜馬飲江水佛狸死
邠年冥期使然非復人事爾智識及衆豈能
勝苻堅邪項年展爾陸梁者是爾未飲江
太歲未邠耳時魏地有童謠故質引之云
輶車北來如穿雉不意虜馬飲江水虜主北歸石濟死
虜欲渡江天不徒

梁武帝時謠

南史曰梁武帝天監元年十一月立長子
統為皇太子時民間有謠按鹿子開者反
語為來子哭也後太子果薨是時長子歡
為徐州刺史以嫡孫次應嗣位而帝意枉
晉安王猶豫未決及立晉安王為皇太子
而歡止封豫章郡王還任謠言心徘徊者
未定也城中諸少年逐歡歸去來者復還

徐方之象也統即昭明太子也

鹿子開城門城門鹿子開當開復未開使我心徘徊城中諸少年逐歡歸去來

梁大同中童謠

隋書五行志曰梁大同中有童謠其後侯景破丹楊乘白馬以青絲為羈勒以應之
青絲白馬壽陽來

梁末童謠

南史曰梁末有童謠及王僧辯滅說者以
為僧辯本乘巴馬以擊侯景馬上郎王字
也塵謂陳也江東謂殺羊角為皂莢隋氏
姓楊楊羊也言陳終滅於隋也

可憐巴馬子一日行千里不見馬上郎但有黃塵起黃
塵汚人衣皂莢相料理

陳初童謠

隋書五行志曰陳初有童謠其後陳主果

為韓擒所敗擒本名擒虎黃班之謂也破
建康之始復乘青驄馬往返時節皆應

黃班青驄馬發自壽陽溪來時冬氣未去日春風始

同前

御路種竹條蕭蕭已復起合盤貯蓬塊無復揚塵已

陳初時謠

日西夜烏飛拔劍倚梁柱歸去來歸山下

後魏宣武孝明時謠

北史魏本紀曰宣武孝明間謠識者以為
索謂魏本索髮焦梨狗子指宇文泰俗謂
之黑獺也

狐非狐貉非貉焦梨狗子齧斷索

後魏末童謠

北史齊本紀曰後魏末文宣未受禪時有
童謠按藁然兩頭於丈為高河邊殺獺為
水邊羊指帝名也於是徐之才勸帝受禪

一東藁兩頭然河邊殺翹飛上天

東魏童謠

北史曰東魏孝靜帝之將立也時有童謠
按青雀子謂靜帝實清河王之世子鸚鵡
謂齊神武也後竟為齊所滅

可憐青雀子飛來鄴城裏羽翮垂欲成化作鸚鵡子
北齊鄴都童謠

隋書五行志曰齊神武始移都於鄴時有

童謠按魏孝靜帝者清河王之子也后則
神武之女鄴都宮室未備即逢禪代作窠
未成之効也孝靜尋崩文宣以后為太原
長公主降於楊愔時婁后尚在故言寄書
於父母新婦子斥后也

可憐青雀子飛入鄴城裏作窠猶未成舉頭失鄉里寄
言與父母好看新婦子

北齊武定中童謠

隋書五行志曰武定中有童謠按高者齊
姓也澄文襄名五年神武崩推折之應七
年文襄遇盜所害澄滅之徵也

百尺高竿推折水底然燈澄滅

北齊文宣時謠

北史齊本紀曰文宣時謠按帝以午年生
故曰馬子三臺石季龍舊居故曰石室三
千六百日十年也文宣在位十年果如謠

言

馬子入石室三千六百日

北齊後主武平初童謠

隋書五行志曰武平元年童謠按其年四月隴東王胡長仁謀遣刺客殺和士開事露反為士開所譖而死

狐截尾你欲除我我除你

北齊後主武平中童謠二首

隋書五行志曰武平二年童謠小兒唱訖
一時拍手云殺却至七月二十五日御史
中丞琅邪王儼執士開送於南臺而斬之
是歲又有童謠而七月士開被誅九月琅
邪王遇害十一月趙彥深出為西兗州刺
史

和士開七月三十日將你向南臺

七月刈禾傷早九月喫餠正好十月洗蕩飯瓮十一月

出却趙老

北齊後主武平末童謠

隋書五行志曰武平末有童謠時穆后母
子淫辟干預朝政時人患之穆后小字黃
花尋逢齊亡欲落之應也

黃花勢欲落清尊但滿酌

北齊末鄴中童謠

隋書五行志曰北齊末鄴中有童謠未幾

周師入鄴

金作埽帚玉作把淨埽殿屋迎西家

周初童謠

隋書五行志曰周初有童謠按靜帝隋氏之甥既遜位而崩諸舅強盛

白楊樹頭金鷄鳴祇有阿舅無外甥

隋煬帝大業中童謠

隋書五行志曰煬帝大業中童謠其後李

密坐楊玄感之逆為吏所拘在路逃叛潛
結羣盜自陽城山而來襲破洛口倉後復
屯兵苑內莫浪語密也字文化及自號許
國尋亦破滅誰道許者蓋驚疑之辭也

桃李子鴻鵠遶陽山宛轉花林裏莫浪語誰道許

唐武德初童謠

新唐書五行志曰竇建德未敗時有此謠
也

豆入牛口勢不得久

唐貞觀中高昌國童謠

唐書曰貞觀中高昌國有此童謠其國王
文泰使人捕其初唱者不能得帝紀曰十
三年以侯君集為交河道行軍大總管帥
師伐高昌十四年平之以其地置西州又
置安西都護府

高昌兵馬如霜雪漢家兵馬如日月日月照霜雪回首

自消滅

唐永淳初童謠

新唐書五行志曰高宗永淳元年童謠是
歲七月東都大雨人多殍殍

新禾不入箱新麥不入場迨及八九月狗吠空垣墻
唐高宗永淳中童謠

新唐書五行志曰高宗自調露中欲封嵩
山屬突厥叛而止後又欲封以吐蕃入寇

遂停時有童謠按舊書武后自封岱之後
勸帝封中嶽每下詔草儀注即歲饑邊事
警急而止永淳中既至山下未及行禮遘
疾還宮而崩

嵩山凡幾層不畏登不得但恐不得登三度徵兵馬傍
道打騰騰

唐武后時童謠

紅綠複裙長千里萬里聞香

唐神龍中謠

新唐書五行志曰中宗神龍以後民謠按
山南唐也烏鵲窠者人居寡也山北胡也
金駱駝者敵獲而重載也

山南烏鵲窠山北金駱駝鎌柯不鑿孔斧子不施柯

唐中宗時童謠

新唐書五行志曰安樂公主於洛州造安
樂寺時有童謠按舊書安樂公主中宗幼

女韋皇后所生初降武宗訓宗訓死降武
延秀所造安樂佛寺擬於宮掖巧妙過之
可憐安樂寺了了樹頭懸

唐景龍中謠

新唐書五行志曰景龍中民謠也按會要
東都聖善寺神龍初中宗為武太后追福
所造景龍中復增廣焉

可憐聖善寺身著綠毛衣牽來河裏飲踏殺鯉魚兒

唐天寶中童謠

新唐書五行志曰天寶中安祿山未反時
童謠按舊書天寶十四載祿山以范陽叛
明年竊號燕國

燕燕飛上天天上女兒鋪白氈氈上有千錢

唐天寶中幽謠

新唐書五行志曰天寶中幽州有此謠也
舊來誇戴竿今日不堪看但看五月裏清水河邊見契

丹

唐德宗時童謠

新唐書五行志曰朱泚未敗前兩月有童謠按舊書建中四年朱泚以涇原兵叛僭號曰大秦明年改號曰漢是歲六月兵敗而死

一隻筋兩頭朱五六月化為蛆

唐元和初童謠

新唐書五行志曰元和初童謠既畢乃轉
身曰舞了也按舊書志云為十年六月三
日武元衡為盜所害之應本傳云打麥謂
打麥時也麥打謂暗中突擊也三三三謂
六月三日也既而旋其袖曰舞了也謂元
衡之卒也

打麥麥打三三三舞了也

唐咸通中童謠

新唐書五行志曰懿宗咸通七年童謠也
草青青被嚴霜鵲始後看顛狂

唐咸通末成都童謠

新唐書五行志曰咸通十四年成都有童
謠是歲歲陰在己明年在午己蛇也午馬
也

咸通癸巳出無所之蛇去馬來道路稍開頭無片瓦地
有殘灰

唐僖宗時童謠

新唐書五行志曰僖宗時有此童謠按舊書云乾符中仍歲凶荒人飢為盜河南尤甚曹州人王仙芝尚君長聚盜起於濮陽攻剽城邑陷曹濮鄆等州五年仙芝敗而黃巢之衆攻江西云

金色蝦蟆爭努眼翻却曹州天下反

唐乾符中童謠

新唐書五行志曰乾符六年童謠也

八月無霜塞草青將軍騎馬步空城漢家天子西巡狩
猶向江東更索兵

唐中和初童謠

新唐書五行志曰中和初有此童謠按舊
書中和四年黃巢既敗以其殘衆東走李
克用追擊至濟陰而還賊散於兗鄆黃巢
入泰山至狼虎谷為其將林言所殺

黃巢走泰山東死在翁家翁

梁太祖時蜀中謠

五代史曰劉知俊初事梁太祖後奔蜀王建雖加寵待然亦忌之常謂近侍曰劉知俊非爾輩能駕馭不如早為之所有嫉之者於里巷間作此謠知俊色黥丑生梭繩者王氏子孫皆以宗承為名故以此猜疑之遂見殺於成都

黑牛出圈椶繩斷

樂府詩集卷八十九